

## Parlamentu Australia hahú prosesa doméstiku tratadu FM

05 November 2018



ATU NAIO RATIFIKASAUN BA TRATADU FRONTEIRA MARITIMA (FM), ENTRE TIMOR-LESTE (TL) NO AUSTRALIA, DAU-DAUN NE'E PARLAMENTU AUSTRALIA HAHÚ ONA PROSESA DOMESTIKU BA RATIFIKASAUN TRATADU FM NE'E.

"Australia prosesa ona prosesu doméstiku atu ratifika tratadu ida ne'e no prosesu ida ne'e la'ó diak, mezmu prosesu tratadu husi Australia nian ne'e komplikadu uitoan. Maibé ha'u sei pública liu husi facebook explorasaun kona-bá prosesu Australia nian, atu esplika ba povu TL," Embaixador Austrália, Peter Roberts ba jornalista sira hafoin akompaña delegasaun deputadu parlamentu Austrália, hasoru Prezidente Parlamentu Nasional (PPN), Arão Noe, hamutuk ho deputadu sira iha salaun konferensia Parlamentu Nasional (PN), Kuarta (31-10-2018).

Parlamentu Australia iha ona prosesu doméstiku atu kria lei foun, hodi ratifika tratadu FM, maibé atu esplika detallu kona-bá asuntu tratadu FM, iha semana ida ne'e nia laran sei pública iha media sosial *facebook*.

"Eis Ministra Negosiu Estranjeiru, Julie Bishop hato'o asuntu tratadu FM ba parlamentu Australia iha fulan Marsu, tinan ne'e no komisaun parlamentar iha Australia rekomenda ona ba Australia nia parlamentu atu ratifika tratadu ida ne'e, tanba tratadu ida ne'e diak ba TL no Australia," haktuir Peter Roberts.

Nia afirma, lori Governu Australia nia naran kontinua apoiu no suporta, atu oinsa prosesa ratifikasaun ba tratadu ne'e, tanba ne'e importante ba TL no Australia.

"Ha'u espera katak ho viajen amizade husi delegasaun parlamentu Australia ba Parlamentu Nasional, política nain husi TL bele vizita Australia, koalia ba malu, importante nuudar parseiru, vijíñu no kolega, atu kria ligasaun forti," relata Embaixador Australia ne'e.

Husi sorin seluk, PPN, Arão Noe sujere ba delegasaun parlamentu Austrália, atu oinsa Parlamentu nasional Timor-Leste no Parlamentu Austrália ratifika tratadu FM iha tempu no oras ne'ebé hanesan.

"Ohin ha'u husu atu sé bele akordu ratifikasaun FM ne'e, ratifika husi parte rua (2) mais rapida possivel, atu nune'e akordu ne'e tama em vigor, atu nune'e ita bele defini ita nia FM ne'e definitivu no bele hametin liu tan kooperasaun no boa vijilansia entre Australia ho TL," haktuir Xefi Órgaun Lejisladór ne'e.

Entretantu objetivu delegasaun parlamentu Austrália nain tolu (3) ne'ebé hao vizita mai PN ne'e ho objetivu atu hametin liu tan kooperasaun entre nasaun rua ninian, liu-liu PN ho Parlamentu Australia. **Ves**